



Pihak Jabatan Agama Islam Perak tidak bertanggungjawab ke atas sebarang penambahan ayat selain daripada kandungan khutbah yang dikeluarkan.

“HINDARI SIFAT MUNAFIK”

11 Februari 2022 / 9 Rejab 1443

إِنَّ الْحَمْدَ لِلَّهِ¹، نَحْمَدُهُ وَنُسْتَعِينُهُ وَنَسْتَغْفِرُهُ، وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ أَعْمَالِنَا، مَنْ يَهْدِهِ اللَّهُ فَلَا مُضِلَّ لَهُ، وَمَنْ يَضِلَّهُ فَلَا هَادِيَ لَهُ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ² وَعَلَى آلِهِ وَأَصْحَابِهِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ. أَمَّا بَعْدُ، فَيَا عِبَادَ اللَّهِ! اتَّقُوا اللَّهَ³ أَوْصِيَكُمْ وَإِيَّايَ بِتَقْوَى اللَّهِ فَقَدْ فَازَ الْمُتَّقُونَ. قَالَ اللَّهُ تَعَالَى فِي الْقُرْآنِ الْكَرِيمِ - بَعْدَ أَعُوذُ بِاللَّهِ مِنَ الشَّيْطَانِ الرَّجِيمِ :-

﴿إِنَّ الْمُنَافِقِينَ يُخَادِعُونَ اللَّهَ وَهُوَ خَادِعُهُمْ وَإِذَا قَامُوا إِلَى الصَّلَاةِ قَامُوا كُسَالًا يُرَاءُونَ النَّاسَ وَلَا يَذْكُرُونَ اللَّهَ إِلَّا قَلِيلًا﴾

(Surah An-Nisa': 142)⁴

Maksudnya: Sesungguhnya orang munafik itu hendak menipu Allah, tetapi Allah membalas tipuan mereka. Apabila mereka berdiri untuk solat, mereka lakukan dengan malas. Mereka melakukan dengan riak (ingin dipuji) di hadapan manusia. Dan mereka tidak mengingati Allah kecuali sedikit sekali.

Sidang Jumaat yang dirahmati Allah,

Marilah kita tingkatkan ketakwaan ke hadrat Allah SWT, dengan istiqamah mentaati segala perintah dan menjauhi segala larangan Nya; mudah-mudahan hidup kita di dunia dan akhirat dilimpahi keberkatan Ilahi. Mimbar pada hari ini akan membicarakan khutbah bertajuk: “HINDARI SIFAT MUNAFIK”.

Daripada segi syariah, munafik merujuk kepada orang yang menyembunyikan kekufuran di dalam hati sementara berpura-pura menzahirkan keimanan; mereka pada zahirnya mengaku keesaan Allah dan kerasulan Nabi Muhammad SAW, tetapi sebenarnya tidak

¹ Memuji Allah

² Selawat ke atas Nabi Muhammad SAW

³ Pesan Taqwa

⁴ Ayat al-Quran



beriman. Daripada segi bahasa, perkataan munafik, merujuk kepada orang yang amalan dan hatinya bercanggah dengan apa yang diperkatakannya; ketika bercakap atau melakukan sesuatu, mereka menyembunyikan maksud sebenar, mereka kelihatan baik pada zahir tetapi memiliki niat jahat yang terselindung, mereka bersifat pepat di luar - runcing di dalam.

Sifat munafik merupakan antara penyakit yang paling bahaya dalam masyarakat, boleh menjadi gunting dalam lipatan dan musuh dalam selimut. Sifat kepura-puraan mereka boleh mengancam kesejahteraan ummah dan keselamatan sesebuah negara. Digambarkan golongan munafik sebagai manusia yang busuk hati kerana hasad dengki terhadap orang beriman seperti firman Allah SWT dalam surah al-Baqarah ayat 10:

﴿ فِي قُلُوبِهِمْ مَرَضٌ فَزَادَهُمُ اللَّهُ مَرَضًا ۗ وَلَهُمْ عَذَابٌ أَلِيمٌ ۖ بِمَا كَانُوا يَكْذِبُونَ ﴾

Maksudnya: Dalam hati mereka (golongan munafik itu) terdapat penyakit (syak dan hasad dengki), lalu ditambah Allah penyakitnya; dan bagi mereka seksa yang pedih, disebabkan mereka berdusta.

Rasulullah SAW mengalami pengalaman pahit akibat perbuatan kumpulan munafik. Mereka berpura-pura di hadapan Baginda menyokong dakwah Islam, namun hakikatnya, mereka berniat mahu memusnahkan Islam, membawa banyak musibah, termasuk mengkhianati umat Islam seperti yang berlaku semasa Perang Uhud. Abdullah bin Ubai telah mempengaruhi sebahagian tentera Muslimin supaya mundur daripada medan perang, mengakibatkan tentera Rasulullah SAW menjadi lebih kecil dan lemah. Kejatuhan Khalifah Abbasiyah juga disebabkan oleh perbuatan khianat salah seorang menteri yang berpenyakit hasad, tergamak bekerjasama dengan musuh untuk membuka laluan membolehkan tentera Tatar masuk menguasai Baghdad. Sabda Rasulullah SAW:

أَرْبَعٌ مَنْ كُنَّ فِيهِ كَانَ مُنَافِقًا خَالِصًا، وَمَنْ كَانَتْ فِيهِ خِصْلَةٌ مِنْهُنَّ كَانَتْ فِيهِ خِصْلَةٌ مِنْ
التَّقَاتِ حَتَّى يَدْعَهَا : إِذَا أُؤْتِمِنَ خَانَ، وَإِذَا حَدَّثَ كَذَبَ، وَإِذَا عَاهَدَ غَدَرَ، وَإِذَا خَاصَمَ
فَجَرَ.

Ertinya: Empat perkara yang ada pada dirinya (semuanya), dia menjadi munafik sepenuhnya dan sesiapa yang ada salah satu daripadanya; nescaya dirinya mempunyai salah satu daripada sifat munafik, sehinggalah dia meninggalkannya. Apabila diberikan amanah berlaku khianat, apabila bercakap dia berbohong, apabila berjanji dia memungkiri janji, dan apabila dia berdebat dia tidak jujur dan bukan mencari kebenaran. (Riwayat Al-Bukhari)



Orang-orang munafik itu dapat dikenali melalui sifat-sifat berikut:

Pertama: Tidak memiliki pendirian kukuh, menunjukkan pendirian yang senantiasa berubah mengikut keadaan, sangat mudah terpengaruh dengan persekitaran, ibarat lalang yang mudah mengikut arah tiupan angin atau sesumpah yang boleh menukar warna kulit mengikut pohon mana ia hinggap.

Kedua: Ingkar kepada janji, mudah berdusta dan mudah bersumpah palsu; cakap siang tidak boleh dibawa ke malam.

Ketiga: Orang munafik juga boleh diibaratkan sebagai pelakon hebat, bijak melakonkan watak mengikut pentas dan penonton, sifat bermuka-muka, memuji sewaktu berhadapan dan mengumpat ketika berada di belakang. Dari Abu Hurairah RA, Rasulullah SAW bersabda, “Kamu akan mendapati manusia yang paling jahat, iaitu memiliki dua wajah, yang datang pada segolongan dengan satu wajah, dan datang pada golongan lain dengan satu wajah”.

Keempat: Mengharapkan apa juga kebaikannya dibalas dengan upah, berbentuk wang ringgit, harta, pangkat dan jawatan; harga dirinya boleh dijual beli dan boleh diperdagangkan; kesetiaan akan berakhir jika tidak mendapat ganjaran atau upah.

Kelima: Menjadikan dunia sebagai matlamat hidup dan terlalu cinta kepada kebendaan.

Keenam: Riyak dan mengejar pujian serta tidak bersedia menerima teguran dan nasihat atas apa juga kelemahan dan kesilapan.

Ketujuh: Jiwa yang senantiasa gelisah dan resah kerana terpaksa bersikap pura-pura di hadapan khalayak.

Kelapan: Kelihatan baik di permukaan tetapi berhati busuk, berniat jahat dan berbuat khianat, serta suka melakukan tipu daya.

Kesembilan: Melakukan kerosakan di bumi, dengan menggunakan tipu muslihat, memutar belitkan fakta memberi alasan mahu membuat perkara baik, sedangkan apa yang berlaku ialah di sebaliknya.

Kesepuluh: Tidak merasa bersalah malah berbangga melakukan dosa dengan memberikan pelbagai hujah untuk menghalalkan apa juga dosa yang telah dilakukan.

Kesebelas: Berhasad dengki terhadap kejayaan dan pencapaian orang lain dan menaruh dendam.



بَارَكَ اللَّهُ لِي وَلَكُمْ بِالْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ
وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ
لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ
فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.

Khutbah Kedua

الْحَمْدُ لِلَّهِ⁵ حَمْدًا كَثِيرًا كَمَا أَمَرَ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ
سَيِّدَنَا وَنَبِيَّنَا مُحَمَّدًا عَبْدَهُ وَرَسُولَهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ⁶ وَعَلَى آلِهِ
وَأَصْحَابِهِ أَجْمَعِينَ. أَمَّا بَعْدُ، يَا عِبَادَ اللَّهِ! اتَّقُوا اللَّهَ⁷ وَكُونُوا مَعَ الصَّادِقِينَ.

Muslimin yang dirahmati Allah,

Berwaspada dengan orang-orang munafik dan jauhkan diri daripada menjadikan mereka sebagai rakan dan sekutu kerana perlakuan munafik amat membahayakan diri, masyarakat, negara dan agama. Sifat munafik akan merosakkan dasar keimanan dan amalan kebaikan. Sikap dan amalan munafik mestilah dihapuskan dalam kehidupan, kerana sepanjang sejarah Islam, golongan munafik ialah perosak kepada kehidupan beragama dan menghalang penghayatan hidup berlandaskan tauhid dan keesaan Allah SWT. Sabda Rasulullah SAW riwayat Imam At-Tobarani:

إِنَّ أَخَوْفَ مَا أَخَافُ عَلَيْكُمْ بَعْدِي كُلُّ مُنَافِقٍ عَلِيمِ اللِّسَانِ.

Maksudnya: Sesungguhnya perkara yang paling aku bimbangkan setelah peninggalan ku iaitu orang munafik yang petah berbicara.

Terkandung 13 ayat di dalam Al-Quran memperingatkan ummah mengenai golongan munafik, bahkan ada satu surah khusus di dalam Al-Quran yang membicarakan perihal munafik iaitu Surah Al-Munafiqun. Sesungguhnya sifat munafik sangat dimurkai oleh Allah SWT berpandukan firman Allah SWT dalam ayat 145 Surah An-Nisa':

﴿ إِنَّ الْمُنَافِقِينَ فِي الدَّرَكِ الْأَسْفَلِ مِنَ النَّارِ وَلَنْ تَجِدَ لَهُمْ نَصِيرًا ﴾

⁵ Memuji Allah

⁶ Selawat ke atas Nabi Muhammad SAW

⁷ Pesan Taqwa



Maksudnya: Sesungguhnya orang munafik itu ditempatkan pada tingkatan neraka paling bawah.

Para tetamu rumah Allah yang dirahmati Illahi,

Mimbar menyeru para jemaah agar kita tetap berpegang kepada aqidah Islamiah berteraskan ahli Sunnah Waljamaah, yang menjadi warisan Rasulullah SAW, sahabat dan tabiin. Jagalah hubungan dengan Allah SWT dan sesama manusia. Makmurkanlah rumah-rumah Allah dengan istiqamah mengerjakan ibadah, terutamanya solat fardu berjemaah.

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا⁸
اللَّهُمَّ صَلِّ عَلَى مُحَمَّدٍ وَعَلَى آلِ مُحَمَّدٍ كَمَا صَلَّيْتَ عَلَى إِبْرَاهِيمَ وَعَلَى آلِ إِبْرَاهِيمَ وَبَارِكْ عَلَى مُحَمَّدٍ وَعَلَى آلِ مُحَمَّدٍ كَمَا بَارَكْتَ عَلَى إِبْرَاهِيمَ وَعَلَى آلِ إِبْرَاهِيمَ فِي الْعَالَمِينَ إِنَّكَ حَمِيدٌ مَجِيدٌ.
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ⁹ وَالْمُؤْمِنِينَ وَالْمُؤْمِنَاتِ وَأَصْلِحْ ذَاتَ بَيْنِهِمْ وَأَلِّفْ بَيْنَ قُلُوبِهِمْ
وَاجْعَلْ فِي قُلُوبِهِمُ الْإِيمَانَ وَالْحِكْمَةَ وَتَثِّبْهُمْ عَلَى مِلَّةِ رَسُولِ اللَّهِ ﷺ.
اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْعَلَاءَ وَالْمِحْنَ وَالْفِتْنَ مَا ظَهَرَ مِنْهَا وَمَا بَطَّنَ عَنْ بَلَدِنَا هَذَا
خَاصَّةً وَعَنْ سَائِرِ بُلْدَانٍ عَامَّةً.
اللَّهُمَّ إِنَّا نَعُوذُ بِكَ مِنَ الْفَقْرِ وَالْكَفْرِ، وَالْفُسُوقِ، وَالشَّقَاقِ، وَالنَّفَاقِ، وَالسُّمْعَةِ، وَالرِّيَاءِ.

Ya Allah, kami berlindung dengan Mu daripada kefakiran, kekufuran, kefasiqan, kederhakaan, kemunafikan, sum'ah dan riyak.

Ya Dzal Jalaali Wal Ikram, jadikanlah kami antara hamba Mu yang memelihara amanah. Kuatkan iman dan hati kami agar menjauhi perbuatan khianat seperti salah guna harta benda bukan milik kami, memberi atau menerima rasuah, menyalahgunakan kuasa untuk kepentingan diri, serta menjauhkan kami termasuk golongan yang mengabaikan tanggungjawab yang diamanahkan.

⁸ Ayat Al-Quran

⁹ Doa untuk kaum muslimin



Ya Maalikal Mulk, jauhi negara kami daripada kehancuran disebabkan perbuatan rasuah; serahkan tanggungjawab pimpinan dan pengurusan negara kami kepada kalangan hamba-Mu yang amanah, jujur dan ikhlas, serta tegas lagi berani menegakkan kebenaran dan melaksanakan keadilan berlandaskan hukum.

Ya Razzaq, berkatilah hamba-Mu yang melaksanakan tuntutan zakat, wakaf dan sedekah. Kurniai rezeki yang berlipat ganda kepada mereka, serta sucikanlah harta dan jiwa mereka, jauhi golongan fuqara dan masakin daripada kekufuran dan kefakiran yang berpanjangan.

Ya Malik, kurniakanlah taufik dan hidayah Mu terhadap raja kami, Duli Yang Maha Mulia Paduka Seri Sultan Perak Darul Ridzuan, Sultan Nazrin Muizzuddin Shah Ibni Almarhum Sultan Azlan Muhibbuddin Shah Al-Maghfur-Lah dan Raja Permaisuri Perak Darul Ridzuan Tuanku Zara Salim serta kerabat diraja dan seluruh rakyat jelata.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ

فِيَا عِبَادَ اللَّهِ، ﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾ ﴿فَاذْكُرُوا اللَّهَ الْعَظِيمَ يَذُكُرْكُمْ، وَاشْكُرُوا لَهُ عَلَى
نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.﴾